

CONCILIVM PROVIN. COLONIEN.

QVibuldam in locis, ambitionis magis, q̄ pietatis causa, dum vtrunque, tam baptismi q̄ confirmationis sacramentum peragitur, hi qui patrie ni dicuntur, certant, vt alter alterum donariorum pretio (quo suscepti ac presentati pueri donantur) vincant. Præterea itur statim maxime post baptismū ad comestiones, cum tum maxime comestationibus esset abstinendum. Qua de re admonendus est populus, vt quæ digna sunt his sacramētis tantum curent. Cætera aut moderentur aut penitus tollant. Nam nō offenderimus deum grauius, q̄ cum illius sanctissima mysteria indigne tractamus.

Docendus populus de signis externis. Cap. XII.

DOcebit præterea parochus populū, quid signet chrisma. Et cur ex oleo oliuæ ac balsamo conficiatur, quemadmodū docebit Enchiridion.

De sacrosancta Eucharistia. Cap. XIII.

EVcharistia, vnicum illud piarum mentium solatium ac delitium hac exploratissima tempestate execranda insania ac abominabili prophanatione hæreticorum de re tanta quodlibet comminiscantium, plerisque quodammodo in nauseam vertitur, adeo vt (quod dolentes referimus) multi nunc sint, qui non tantum hunc panem vitæ, qui de cælo descendit, accipere non desiderant, sed & auerferunt, homines solo nomine Christiani, re ipsa vero Capernaitis ipsis deteriores, etiam quos post acceptam notitiam veritatis, voluntarie in filium dei peccantes ac corpori dominico & sanguini contumeliam inferentes, terribilis quædam expectatio iudicij, & ignis æmulatio (quæ consumptura est aduersarios) manet.

Quid docendus populus in huius sacramenti ministracione. Cap. XIII.

DOcendus est itaque populus Christianus certissima fide credere, q̄ in hoc sacramento sit verum corpus & verus sanguis Christi Iesu. Neque enim veritas mentitur, quæ apud Mathæum, Marcum, & Lucam hoc sacramentum instituens ac porrigens, simplicissime dixit. Accipite & comedite, hoc est corpus meum, quod pro vobis tradetur. Hic est sanguis meus novi testamenti, qui pro vobis & pro multis effundetur in remissionem peccatorum. Hoc facite in meam commemorationem. Sic docet Paulus Apostolus: Calix benedictionis cui benedicimus, nonne communicatio sanguinis Christi est: Et, Panis quem frangimus, nonne participatio corporis domini est: Vnde consequitur in Eucharistia totum esse Christum, quanquam ibi sit sub ratione cibi & potus, Qui enim tradidit verū corpus & sanguinem, haud dubie tradidit viuum. Quare si credimus in sepulchro diuinam naturam non fuisse separatam ab exanimi corpore, quāto magis credemus eam a viuo corpore non esse separatam in sacramento.

Quibus